


He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. Anei ngā taputapu mō te mahi pitakataka. He aha te mahi pai ki a koe? Ko te tāuhu kōunu, ko te pae rānei? Kimihia ngā taputapu i roto i te pukapuka *Pitakataka*.

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te timatanga ki te mutunga o te pānui.

Kōrerorerotia ētahi taputapu mō te mahi pitakataka.

Matapakia te āhua e rerekē ai ki tēnā, ki tēnā tangata ngā momo taputapu pai ki te whakamahi.

Kimihia mēnā he pai ki te ākonga te mahi pitakataka, kāore rānei. Ki te kore, he aha ai?

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuratanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Ko te aha te kaupapa o te pukapuka?
2. He aha ngā taputapu e pai ana ki ia tamaiti?
3. Ko ngā aha ngā mea e pai ana ki ngā tamariki katoa?
4. Ki ōu whakaaro, he aha e rerekē ai ngā momo taputapu e pai ana ki ia tamaiti?
5. Ki ōu whakaaro, nā te aha ngā paoro i pai ai ki ngā tamariki katoa?

Ngā whakautu ki ngā whakapuaki māramatanga

1. Ko te mahi pitakataka.
2. He pora, he pae, he pīrori, he tāuhu kōunu, he ripene, he paoro.
3. Ko ngā paoro.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuratanga o te pukapuka nei.

Te pūtake

T He whakaroa i ngā mōhiohio mai i te pukapuka.

He whakatakinga ā-roro, he whakaharatau

I mua i te pānui i te pukapuka, matapakia ngā momo taputapu rerekē hei mahi pitakataka me ētahi o ngā mahi ka taea mā te whakamahi i ia momo taputapu.

Kia oti i te ākonga te pukapuka te pānui, kōrerorerotia te otinga i ia tamaiti tāna ake taputapu pai rawa, engari i pai ngā paoro ki a rātou katoa. Matapakia ngā momo taputapu rerekē me ngā pūkenga rerekē e hiahiatia ana mō tēnā, mō tēnā.

Matapakia ngā mahi pitakataka e pai ana, e māmā ana, e uaua ana rānei ki te ākonga. Tonoa ia ki te whakamārama mai i ngā take e pērā ana.

Kua rongo te ākonga mō ētahi kaipitaka rongonui, kua kitea pea i te pouaka whakaata? Ki tōna whakaaro, he aha ngā mahi pitakataka pai ki te mātakitaki. He aha i pērā ai ōna whakaaro?